



**ՀԱՆՈՒՆ ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ
ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՍԱՀՄԱՆԱԴՐԱԿԱՆ ԴԱՏԱՐԱՆԻ
ՈՐՈՇՈՒՄԸ**

2023 ԹՎԱԿԱՆԻ ՆՈՅԵՄԲԵՐԻ 16-ԻՆ ԵՐԵՎԱՆՈՒՄ ՍՏՈՐԱԳՐՎԱԾ «ՄԻՋԱԶԳԱՅԻՆ ԱՐԵՎԱՅԻՆ ԴԱՇԻՆՔԻ (ՄԱԴ) ՀԻՄՆԱԴՐՄԱՆ ՄԱՍԻՆ» ՇՐՋԱՆԱԿԱՅԻՆ ՀԱՄԱՁԱՅՆԱԳՐՈՎ ԱՄՐԱԳՐՎԱԾ ՊԱՐՏԱՎՈՐՈՒԹՅՈՒՆՆԵՐԻ՝ ՍԱՀՄԱՆԱԴՐՈՒԹՅԱՆԸ ՀԱՄԱՊԱՏԱՍԽԱՆՈՒԹՅԱՆ ՀԱՐՅԸ ՈՐՈՇԵԼՈՒ ՎԵՐԱԲԵՐՅԱԼ ԳՈՐԾՈՎ

Քաղ. Երևան

4 հունիսի 2024 թ.

Սահմանադրական դատարանը՝ կազմով. Ա. Դիլանյանի (նախագահող), Վ. Գրիգորյանի, Հ. Թովմասյանի, Դ. Խաչատուրյանի, Ե. Խունդկարյանի, Հ. Հովակիմյանի, Է. Շաթիրյանի, Ս. Սաֆարյանի, Ա. Վաղարշյանի,

մասնակցությամբ (գրավոր ընթացակարգի շրջանակներում)՝

Կառավարության ներկայացուցիչ՝ Տարածքային կառավարման և ենթակառուցվածքների նախարարի տեղակալ Հ. Վարդանյանի,

համաձայն Սահմանադրության 168-րդ հոդվածի 3-րդ կետի, 169-րդ հոդվածի 3-րդ մասի, ինչպես նաև «Սահմանադրական դատարանի մասին» սահմանադրական օրենքի 23-րդ հոդվածի 1-ին մասի, 40 և 74-րդ հոդվածների,

դռնբաց նիստում գրավոր ընթացակարգով քննեց «2023 թվականի նոյեմբերի 16-ին Երևանում ստորագրված «Միջազգային արևային դաշինքի (ՄԱԴ) հիմնադրման մասին» շրջանակային համաձայնագրով ամրագրված պարտավորությունների՝ Սահմանադրությանը համապատասխանության հարցը որոշելու վերաբերյալ» գործը:

Կառավարությունն իր՝ 2024 թվականի ապրիլի 4-ի N 472-Ա որոշմամբ հավանություն է տվել «2023 թվականի նոյեմբերի 16-ին ստորագրված «Միջազգային արևային դաշինքի (ՄԱԴ) հիմնադրման մասին» շրջանակային համաձայնագիրը վավերացնելու

մասին» օրենքի նախագծի վերաբերյալ Կառավարության օրենսդրական նախաձեռնությանը և որոշել է այդ համաձայնագրում ամրագրված պարտավորությունների՝ Սահմանադրությանը համապատասխանության հարցով դիմել Սահմանադրական դատարան:

Գործի քննության առիթը Կառավարության՝ 2024 թվականի ապրիլի 15-ին Սահմանադրական դատարան մուտքագրված դիմումն է:

Ուսումնասիրելով վերոնշյալ համաձայնագիրը, հետազոտելով սույն գործով Կառավարության ներկայացուցչի գրավոր բացատրությունը և գործում առկա մյուս փաստաթղթերը՝ Սահմանադրական դատարանը **Պ Ա Ր Ձ Ե Ց**.

1. «Միջազգային արևային դաշինքի (ՄԱԴ) հիմնադրման մասին» շրջանակային համաձայնագիրը (այսուհետ նաև՝ Համաձայնագիր) ստորագրվել է 2023 թվականի նոյեմբերի 16-ին Երևանում:

2. Համաձայնագրի նպատակներն են՝ Միջազգային արևային դաշինքի (ՄԱԴ) ստեղծումը և վերջինիս միջոցով, Համաձայնագրի կողմերի կարիքներին համապատասխան, արևային էներգիայի ընդլայնման հիմնական ընդհանուր մարտահրավերներին միասնաբար դիմակայումը:

3. Համաձայնագիրը կազմված է նախաբանից և տասնչորս հոդվածից:

4. Համաձայնագրով Հայաստանի Հանրապետությունը փոխադարձության հիման վրա ստանձնում է հետևյալ պարտավորությունները.

4.1. համակարգված գործողություններ իրականացնել կամավոր հիմունքներով մեկնարկած Ծրագրերի և գործունեության միջոցով, որոնք ուղղված են, ի թիվս այլնի, արևային ֆինանսների, արևային տեխնոլոգիաների, նորարարությունների, ուսումնասիրությունների և զարգացման, ինչպես նաև կարողությունների զարգացման պահանջարկի ավելի լավ ներդաշնակեցմանն ու համախմբմանը (հոդված 2, կետ 1),

4.2. Համաձայնագրի 2-րդ հոդվածի 1-ին մասում ամրագրված պարտավորության իրականացման նպատակով սերտորեն համագործակցել և ձգտել փոխշահավետ հարաբերություններ հաստատել համապատասխան կազմակերպությունների, պետական և մասնավոր շահագրգիռ կողմերի և ոչ անդամ պետությունների հետ (հոդված 2, կետ 2),

4.3. այն արևային հավելվածների համար, որոնց հետ կապված՝ ՄԱԴ-ի շրջանակներում կոլեկտիվ գործողությունների արդյունքում առկա է օգուտ ստանալու ակնկալիք, ինչպես նաև հիմնվելով արևային հավելվածների ընդհանուր վերլուծական քարտեզագրման վրա՝ տրամադրել և թարմացնել համապատասխան տեղեկություններ իր կարիքների և նպատակների, այդ նպատակներին հասնելու համար ձեռնարկված կամ ձեռնարկվելիք ներպետական միջոցառումների ու նախաձեռնությունների, արժեշղթայի և տարածման գործընթացում առկա խոչընդոտների վերաբերյալ (հոդված 2, կետ 3),

4.4. ՄԱԴ-ի համար նշանակել ազգային համակարգող մարմին, որը, ի թիվս այլնի, կփոխգործակցի ՄԱԴ-ի անդամ երկրների ազգային համակարգող մարմինների, ինչպես նաև շահագրգիռ կողմերի հետ ընդհանուր հետաքրքրություն ներկայացնող ոլորտների բացահայտման, Ծրագրերի հետ կապված առաջարկներ մշակելու և Քարտուղարությանը ՄԱԴ-ի նպատակների իրականացման վերաբերյալ առաջարկներ ներկայացնելու համար (հոդված 2, կետ 4),

4.5. համակարգված ձևով և Քարտուղարության աջակցությամբ իրականացնել ՄԱԴ-ի ծրագրում ներառվող գործողությունները, նախագծերը և աշխատանքները՝ Համաձայնագրի 1-ին և 2-րդ հոդվածներում նկարագրված նպատակն ու հիմնարար սկզբունքներն իրականացնելու համար (հոդված 3, կետ 1),

4.6. Համաձայնագրի իրականացման և դրա նպատակին հասնելու համար ձեռնարկվելիք համակարգված գործողությունների վերաբերյալ որոշումներ կայացնելու նպատակով Համաձայնագրի այլ Անդամների հետ ստեղծել Ժողով, որտեղ ներկայացված կլինի Համաձայնագրի յուրաքանչյուր Անդամ (հոդված 4, կետ 1),

4.7. Համաձայնագրի մյուս կողմերի հետ ստեղծել Քարտուղարություն՝ Համաձայնագրի շրջանակներում նրանց կոլեկտիվ աշխատանքին աջակցելու համար (հոդված 5, կետ 1),

4.8. Հատուկ Ծրագրին մասնակցելու դեպքում հատուկ Ծրագրին մասնակցող մյուս պետությունների հետ միասին և Քարտուղարության օժանդակությամբ ու աջակցությամբ գնահատել և մոբիլիզացնել հատուկ Ծրագրի իրականացման համար անհրաժեշտ ֆինանսական ռեսուրսները՝ բացառությամբ ընդհանուր բյուջեի շրջանակներում նախատեսված վարչական ծախսերի (հոդված 6, կետ 4),

4.9. Հայաստանի Հանրապետության տարածքում ՄԱԴ-ի Քարտուղարությանը տրամադրել այնպիսի անձեռնմխելիություն և արտոնություններ, որոնք անհրաժեշտ են նրա գործառույթներն ու ծրագրերն ինքնուրույն իրականացնելու համար՝ իր տարածքի օրենքներին համապատասխան և անհրաժեշտության դեպքում առանձին Համաձայնագրի համաձայն (հոդված 10, կետ 3):

Ելնելով գործի քննության արդյունքներից և ղեկավարվելով Սահմանադրության 168-րդ հոդվածի 3-րդ կետով, 170-րդ հոդվածի 1-ին և 4-րդ մասերով, ինչպես նաև «Սահմանադրական դատարանի մասին» սահմանադրական օրենքի 63, 64 և 74-րդ հոդվածներով՝ Սահմանադրական դատարանը **Ո Ր Ո Շ Ե Ց**.

1. 2023 թվականի նոյեմբերի 16-ին Երևանում ստորագրված «Միջազգային արևային դաշինքի (ՄԱԴ) հիմնադրման մասին» շրջանակային համաձայնագրով ամրագրված պարտավորությունները համապատասխանում են Սահմանադրությանը:

2. Սահմանադրության 170-րդ հոդվածի 2-րդ մասի համաձայն՝ սույն որոշումը վերջնական է և ուժի մեջ է մտնում հրապարակման պահից:

ՆԱԽԱԳԱՀՈՂ



Ա. ԴԻԼԱՆՅԱՆ

4 հունիսի 2024 թվականի
ՍԴՈ-1732